

平定粵匪紀略

欽惟我

朝重熙累洽二百餘年文治武功卓躒今古乃粵逆初起
羣盜如毛林文忠未至軍而薨李文恭方出師而歿繼
以周寶烏向諸公而一挫於平南再挫於永安功隳垂
成餘燼復煽而湘而衡而鄂而皖以至金陵不守逆燄
肆張其故何歟承平日久民物滋豐數窮理極天道也
兵不習戰將不知兵或視爲邊徼小寇而輕心掉之及
猝臨變故則又相顧愕然罔知所措人事也天運循環
平陂往復我

文宗顯皇帝聖武天錫咸豐壬子

特畀曾公國藩以簡練湘卒之權余以菲材亦拜督師之命當是時江漢三陷矣余與中丞胡文忠檄求湘援竭智畢能者兩載乃拔漢陽趨武昌刷黃蘓蘄曾公復率羣師水陸東下是時我軍聲威能振逆勢仍極鴟張凡陣亡者若而人挫衄者若而人東南繼陷者若而郡邑行省曾公督師自楚攻江皖胡文忠駐楚皖界余亦控上游與爲首尾之應潯陽再駕而始平金陵九困而不拔恭逢我

皇上稟

兩宮皇太后慈訓

廟略十全俾曾公得以運籌於安慶沅圍中丞躬冒矢石於城下破巨穴而殲醜類吳越肅清大功乃告厥成蓋其難也竊維自古朝廷之聖莫聖於我

朝今日人才之盛莫盛於衡霍余尤幸者當前將帥奇才如林無不意相合力相齊患相恤功相讓信乎同寅協恭如此其和衷也夫鬼方之克非傳說力高宗力也車攻馬同非方召申甫力宣王力也有唐淮西小役耳昌

本定身國新略 戶
黎作頌亦推本於惟斷乃成而况我

朝聖德神功撥亂反之正者度超前古曾公與余輩所上
兵事一經

聖裁萬里外如親堂陛可不敬謹編次傳信萬世乎因商
之唐蔭雲廉訪丁心齋盛旭人鄭譜香觀察擬緝平定
粵匪一書杜小舫觀察久贊江南戎旃比督淮筴在楚
屬任纂輯之役蔭雲諸君參酌討論之越半年成紀略
十八卷附記四卷以恭紀

聖功而昭來許其事覈其言切粵匪所擾之處陷而失克

而復罪而罰功而賞皆以各處奏報所奉

諭旨爲經足與

國史相表裏夫天祿石渠匪特草野不能見卽仕宦亦不能徧窺此書出而荒陬遐澁白叟黃童皆可按籍而仰

文宗顯皇帝之經營彪炳星日

皇上所以紹開泰運人才所以効命

朝廷者一展卷而恍然置身揖讓於兩階干羽間也爰弁簡端用上萬年有道之頌焉同治四年閏五月總督兩湖使者官文序

平定粵匪紀略總目

第一卷

道光三十年六月起至咸豐二年十二月止

第二卷

咸豐三年

第三卷

咸豐四年

第四卷

咸豐五年

第五卷

咸豐六年

第六卷

咸豐七年

第七卷

咸豐八年

第八卷

咸豐九年

第九卷

咸豐十年正月起至六月止

第十卷

咸豐十年七月起至十二月止

十一卷

咸豐十一年正月起至六月止

十二卷

咸豐十一年七月起至十二月止

十三卷

同治元年正月起至六月止

十四卷

同治元年七月起至十二月止

十五卷

同治二年正月起到至六月止

十六卷

同治二年七月起至十二月止

十七卷

同治三年正月起到至四月止

十八卷

同治三年五月起至九月止

附記四卷

賊名記

邪說記

逆蹟記

瑣聞記

平定粵匪紀略條目

一是紀仿

皇朝武功紀盛及

聖武記編輯自道光三十年六月廣西倡亂起至同治三年九月生擒洪福瑱止都爲十有八卷據事直書節去繁冗不敢臆增一字

一史書備列盜賊姓名事蹟以懲奸慝粵逆潢池盜弄實繁有徒正記難詳故另列賊名記邪說記逆蹟記瑣聞記凡四卷

一逆匪蹤迹或傳諸在事之人或見諸時人筆記及諸臣行述傳鈔供詞必考證確符始列於篇戰功悉遵邸報不敢有所增益因是編成於湖北疏稿文集均資采取故述楚事較詳

一在事文武同官同姓者居多紀中不得不直書其名欽差大臣及各直省督撫則書銜書姓而不名有述

旨處仍書名

一文武員弁升降不時皆就其時之官書之有奏疏叙名而未詳爲何官者仍照書名

一 是編專叙粵逆事如僧王及吳漕督之勦除擒匪多將軍之蕩洗回匪各直省之懲捕騎馬賊土匪教匪非無豐功偉績因與粵逆隔絕故未備書

一 逆匪竄陷城邑有未見邸鈔者闕之尋常戰功數數見者皆不書

一 殉難文武官紳貞烈婦女但經各省采訪無不上邀恩卹已沐

闡揚之典無俟尤書惟擇其最著者酌書之

一 我

朝積德累仁

神天默護兵興後各省所報

關帝及諸神顯聖護佑者數十疏均已疊奉

綸音分別崇封書額酬答

靈貺不及縷書其有

神異尤著者述瑣聞附記中

一是編專敘實事不尙文辭凡忠臣碩士所作絕命詞

及哀江南諸詩賦概未鈔錄

一兵興之前童謠里讖無處無之非不隨時徵應究屬

虛渺概不敢書

一擾亂之地甚廣戡亂之功甚宏是編僅錄所見所聞
竊恐挂漏不少伏望閱者搜羅考訂不憚見貽俾資
改補以備

方略之采取幸甚

平定粵匪紀略卷一

道光三十年庚戌六月廣西逆民洪秀全倡亂於桂平縣之金田邨

廣西去京師四千六百餘里五嶺西偏蠻夷雜育醜類素易嘯聚唐時黃巢舉亂編筏浮湘水逾江而東渡淮而北禍徧天下發軔實維桂州桂卽今之廣西省會也我

朝聲教所訖反舌裸身之國雕題黑齒之鄉罔不航寶梯琛稽顙交臂卽間有邊費一經撻伐剋日盪平何期

桂林貢賦內地而逆匪洪秀全等竟踵黃巢之迹弄
兵潢池荼毒泯焚爲禍至此初道光二十七年間粵
西歲饑多盜巡撫鄭祖琛嚴檄緝治不能戢適有湖
南逆民雷再浩擾至粵境盜益肆柳慶思潯及南甯
梧州各郡爲尤甚按察使勞崇光馳往捕治南路稍
平二十九年新甯逆民李沅發復竄及柳州桂林三
十年四月遂沅發回新甯甫就擒而粵匪復譙起有
陳亞癸歐祖潤山猪箭顏品璠等各率黨羽數千四
路劫掠此外未著名者不下數十股斯時洪秀全等

伏而未動也六月鄭巡撫出師督勦駐平樂府洪秀
全等始倡亂於桂平縣之金田邨秀全者原籍廣東
花縣生於嘉慶十七年壬申身癡肥略識字父名國
游與母均早死素飲博無賴以演卜游江湖問先是
廣東有奸民朱九濤倡上帝會邪教亦名三點會秀
全及同邑之馮雲山師之旋以秀全爲教主道光十
六年秀全及雲山至廣西住桂平武宣二縣接壤之
鵬化山中傳其教桂平人曾玉珩家素豐延秀全訓
蒙時秀全妹婿蕭朝貴武宣人亦家於桂平與楊秀

清比鄰遂與秀清相結納桂平人韋昌輝貴縣人石
達開先後入教秀全病極危旋愈詭云病死七日而
蘇能知未來事謂舉世將有大災惟入會拜上帝可
免拜上帝者各納銀五兩爲香燧資凡入會不稱師
徒而曰兄弟遇婦女則曰姊妹意不欲人自貶則易
廣其傳故楊秀清等皆兄事之秀全自知無術不足
惑衆乃託名西洋教彼教所崇爲耶蘇秀全欲駕而
上之撰天父名目謂天父名耶火華以耶蘇爲長子
秀全爲次子故稱耶蘇爲天兄復與馮雲山盧賢拔

等造真言寶誥諸偽書密爲傳布潛蓄髮藏山箐間
嗾人分途簧誘連界之武宣象州藤縣陸川博白各
邑人心浮動附從者日多歛資亦漸鉅遂萌逆志當
是時秀全所惑僅下愚之眾即使嘯聚亦只如川蜀
之米賊宋之王則等耳苟有良有司安撫而驅除之
無難立定者何致勞師燁武擾亂十有五年蹂躪十
有六省淪陷至六百餘城之眾哉乃長吏務爲姑息
不事勦撫僅令鄉團守望相助復無董率一任鄉練
與會匪各樹旗鼓爭爲長雄致令蠢醜屯聚日繁遂

於金田倡亂

八月楊秀清等迎洪秀全移屯武宣縣東鄉招集亡命
復返金田

楊秀清原籍廣東嘉應州遷居廣西桂平縣大黃江
世以種山燒炭爲業秀清獨無賴游蕩蕭朝貴武宣
縣盧陸尚農民妻洪秀全之妹馮雲山廣東花縣人
先與洪秀全立上帝會邪教爲桂平縣訪獲囚於獄
同教匪徒黃玉崑等贖錢營救得釋韋昌輝原名止
亦桂平人住金田石達開原籍廣東和平縣住廣西

貴縣家小康讀書未成遂業農五人者年皆三十餘
以次與洪秀全結納秀清尤狡獪因秀全捏造天父
遂證其說自作巫謂天父下凡附其身詞人陰私搥
發之羣驚爲神嘗託天父言挾制洪秀全令前跪受
杖已有不韙亦伏地令人杖之不少貸以是蕭朝貴
等篤信之又貴縣已革壯勇秦曰綱亦入其教六人
分布各邑輾轉誘聚入會者漸衆三十年六月起事
時洪秀全密藏於平南縣花州胡以眈家秀清率眾
迎之至金田旋移屯於武宣縣東鄉招集拜上帝之

亡命者適有貴縣游民林鳳祥廣東揭陽縣海盜羅大綱等率眾從之又湖南衡山縣人洪大全幼穎慧甫八齡能默誦十三經陰自負知秀全倡亂卽往依附遂爲部署隊伍馬匹旂幟器械漸備返屯金田

十月前兩江總督李星沅爲

欽差大臣赴廣西勦賊

鄭巡撫抵平樂縣疏入奉

旨調固原提督向榮爲廣西提督赴粵會勦九月至桂林時慶遠思恩南甯等府土匪正熾向提督馳往勦辦

洪秀全等益猖獗巡撫馳奏

上命前雲貴總督林則徐爲

欽差大臣馳赴廣西與鄭巡撫向提督前雲南提督張必
祿會勦旋據給事中袁甲三奏參鄭巡撫欺飾彌縫
各罪飭據兩廣總督徐廣縉覆奏撫臣年老多病文
武皆不畏服得

旨革職林總督以

欽差大臣暫署廣西巡撫嗣林大臣薨於途張提督甫至
溇州亦薨奉

平定回疆方略卷一百一十五
旨令前兩江總督李星沅爲

欽差大臣赴廣西督辦李大臣於十月抵桂林

十一月我軍至金田勦賊失利

賊由金田竄平南之思旺墟副將李殿元等然礮擊之勢少卻復分股回撲致巡檢張鏞罵賊遇害賊仍返金田老巢金田距潯州府城僅四十餘里張提督薨後所統貴州安徽等綠營兵均屯潯城李大臣飭貴州鎮遠鎮總兵周鳳歧接統之十一月二十六日派貴州清江協副將伊克坦布等往勦延至二十九

日始接仗初桂平毗連之貴縣有廣東嘉應州民數千人聚居縣民目爲來人常欺凌之來人積怒適於二十八日投金田助逆賊得生力軍膽勢正壯遂圍我軍伊副將及千總田繼壽把總潘繼邦外委彭昌鏞陣亡周總兵馳往援應堵禦一晝夜斃賊數百人始解圍

十二月前漕運總督周天爵署廣西巡撫會同勦賊上以廣西賊勢漸眾復

派前漕運總督周天爵赴粵會辦旋令署廣西巡撫時金

田賊眾裹脅日多附近各邨紳富搜括靡遺周總督
察此股爲勁匪咨商向提督自橫州旋師專勦金田
之賊

咸豐元年辛亥正月洪秀全等僭僞王號於大黃江竄
擾桂平貴縣武宣平南等縣入象州境

逆眾由金田出關經八崗水而至大黃江向提督於
正月十八日督隊進攻斃賊二百餘名竝拋擲火具
燬其房屋以賊眾兵單致投効候選衛守備王崇山
等十二員亡於陣洪逆遂益驕橫僭僞號爲太平王

復將大黃墟縱火燬盡悉裹其眾分擾桂平貴縣武
宣平南等縣入象州境

二月廣州副都統烏蘭太馳驛往廣西幫辦軍務

烏都統奉

旨馳驛由廣東起程三月卽至粵與尙提督會商勦辦疊
有斬擒賊勢少戢

三月大學士賽尙阿爲

欽差大臣率都統巴清德副都統達洪阿管帶京兵馳往
楚粵之交防堵

粵西羣盜日久稽誅

上眷念邊疆不安宵旰

特命大學士賽尙阿等馳往楚粵之交駐紮調度並
諭李星沅等不得以

特派有人稍存觀望又

命周天爵專辦軍務廣西巡撫著藩司勞崇光暫行署理
四月賽大臣等出都

四月初九日賽大臣

陞辭出都

特賞遏必隆刀以壯其行奏帶侍衛開隆阿天津鎮總兵長瑞甘肅涼州鎮總兵長壽軍機章京戶部司員丁守存聯芳等十餘員火器營烏蘭都等京兵二百名部撥饌銀一百萬兩又由內務府廣儲司撥發內庫銀一百萬兩

李大臣由柳州進駐武宣舊病增劇旋薨

李大臣先曾奏請專派總統期於事權歸一賽大臣起程之前已

密交諭旨令赴廣西軍營並傳知李星沅回湖南會辦防

堵至是復

諭賽大臣馳赴廣西接辦

欽差大臣事務並

授鄒鳴鶴爲廣西巡撫兼程赴任令李星沅回籍養病李
大臣旋以疾薨

五月烏都統等敗賊於象州

逆眾由武宣竄至象州之中坪等處五月初八日烏
都統統帶貴州三營官兵自羅秀拔營駐梁山邨向
提督由桐木拔營駐中坪之東雲南昭通鎮總兵經

文岱等駐寺都皆距賊巢十里初十日賊匪十數艘約四五千人渡河撲營我兵奮勇攻擊斃賊千餘人賊隊盡散十三等日三戰皆捷

六月賽大臣抵廣西破賊於新墟

洪秀全等由象州竄回桂平之新墟六月初五日賽大臣抵桂林省添募廣勇潮勇合先後所調滇黔川楚兵勇約共三萬餘人分派將弁嚴堵各要隘飭烏都統剋期會勦二十七日由官甲潛行渡江偵知竹園邨竹木叢雜令總兵秦定三伏兵其處引賊入伏

平定縣志卷之九
一
九
一日七勝殲擒二三千人破其英邨巢穴賊仍遁入

新墟

七月奪獲雙髻山等要隘

逆匪竄踞紫荆山前以新墟爲門戶後以雙髻山猪
仔峽爲要隘七月初十日分路進兵達洪阿攻西南
烏蘭太秦定三攻西北總兵李能臣經文倂分攻東
南正東巴清德向榮由紫荆山後路進十五日直登
猪仔峽據其要口雙髻山之賊見我兵已奪要隘槍
礮木石如雨齊發巴清德傳令奮力抵禦時川楚各

兵已繞出賊後上下夾攻賊眾大潰遂奪雙髻山要隘

八月破賊於風門坳賊竄永安

破雙髻山後向提督欲乘勝直擄花雷茶地等賊巢巴都統以五不可議阻之遲五日始進兵賊於風門坳口築壘安礮竝鑿斷山梁爲負隅死守計八月初二日我兵分三路奮攻賊始棄隘敗走乘勢追勦據其風門坳要害陣斃韋昌輝之弟韋亞孫韋十一等賊始退竄向提督由桂平追之烏都統及提督秦定

三總兵經文岱由鵬化山追之烏軍阻於山內向軍
遇賊因雨致挫軍仗盡失賽大臣奏參革職留營効
力達都統與烏都統不相合接戰復挫劄亦請撤回
巴都統病甚入平樂府旋薨向提督於平南整理軍
械留十餘日始行賊分二路竄永安

閏八月洪秀全等陷永安州建僞號爲太平天國封各
僞王

賊由大黃墟分水陸兩路經大黎向永安州閏八月
初一日陷之遂僭僞國號爲太平天國洪秀全爲僞

天王楊秀清爲僞東王蕭朝貴爲僞西王馮雲山爲
僞南王韋昌輝爲僞北王石達開爲僞翼王洪大全
爲僞天德王秦日綱羅亞旺范連德胡以晄等各稱
丞相軍師等僞職

九月竇大臣移營陽朔

時廣西股匪分兵勦襲漸就肅清陳亞貴一股爲署
桂平縣知縣李孟羣擒獲顏品瑤一股爲藩司勞崇
光設策梟誅擊散其眾餘匪二十餘股殲滅無遺九
月十一日竇大臣移營陽朔專勦洪逆

十月烏都統攻莫家邨大捷

賊分大股屯莫家邨以阻攻永安之路距邨十餘里有三嶺中曰秀才左曰龍虎右曰石燕烏都統相度形勢紮火器營小隊於秀才嶺暗埋地雷等火具派隊誘賊誠以俟賊出卽沿左右二嶺緩撤過嶺列陣以待自建中軍旗鼓於秀才嶺最高處帳前植一紅蓋賊果大至爭撲中軍都統率小隊自嶺後徐退賊拔其紅蓋火機觸發全嶺奔裂燔賊以數千計大隊乘之旋克莫家邨此後賊見烏都統所植旂幟輒不

敢近

十一月合兵攻永安

粵西諸將惟向提督老於軍事賽大臣攻永安賊分守城南之水竇邨爲犄角勢賽大臣以烏都統督辦南路劉長清督辦北路其東西山亦各派鎮將守之長清不能馭衆以向督提爲北路督辦時已奉

旨賞給三品頂戴接任後激勵將士疊獲勝仗十餘次連營進逼賊不敢出賽大臣請開復廣西提督原官

十二月賽大臣親駐永安督勦

賽大臣於十二月十八日由陽朔移營荔浦二十六日至永安州向提督統軍北路聲威漸震二十八及三十日賊匪出巢窺伺均擊退

咸豐二年壬子正月大兵圍永安

正月初一二三等日四路進攻竝擊其東西礮臺城已將克適儘先參將李廷楷等陣亡諸將少卻賊退入城初八初十及十二日賊出撲營均卽擊退賊之礮臺望樓兩處爲風雷擊燬

二月賊潰圍東竄官兵收復永安州陣擒僞天德王洪

大全檻送京師

我兵圍永安於城外築礮臺日夜轟擊二月十七日
四鼓賊撲壽春營我兵少却賊由古東冲小路出關
偽丞相秦曰綱先屯水竇移屯仙回嶺十八日烏都
統搶山岡夾擊殺賊二千餘人生擒洪大全時大雨
不止軍無宿處餒甚與向提督商定整軍再入五更
後烏都統忽自率親兵入山向提督疾飭各鎮接應
賊台隊復戰山逕犖确又天雨路滑未及列陣賊眾
冒死衝突總兵長瑞長壽董先甲邵鶴齡陣亡賊繞

山路直竄至距省六十里之六塘墟烏都統追至將
軍橋散受礮子傷都統有謀勇能卹士卒每以輕敵
涉險人皆危之至是果中流礮旋逝方賊竄出時我
兵乘勢收復州城丁守存聯芳等檻送洪大全至京
師磔於市

三月賊犯廣西省城

楊秀清知我兵力尙厚不敢道昭平平樂由小路經
牛角窠山出馬嶺六塘高田逕撲桂林省韋昌輝率
千餘賊追奪洪大全不及亦趨桂林向提督策賊必

犯省城率親兵繞道介馬疾馳先一時晉省賊踵至
會同巡撫鄒鳴鶴藩司吳鼎昌副將馬龍開等晝夜
守禦賊夾灘江而營在東南文昌門外之象鼻山架
礮轟擊鉛丸入城如雨落城中官民靜守不爲動賊
近城布雲梯輒焚油燔之斃賊極衆賊又以大竹製
呂公車高與城齊數十人登車平攻我以槍礮對擊
復紮長竿縛火炬燒之賊多墜死相持三十一日賊
知不可犯乘夜解圍北去

四月陷全州

桂林解圍後賊由興安攻全州湖南寶慶營都司武昌顯率所部五百人會知縣守城賊肉薄城根武昌顯令煎松膠瀝糠爲餅火之投下賊多死賊乃穴地燒溼薪煙障眯目咫尺不能辨諸軍之援全者皆壁十數里外數日地雷發城陷被禍極慘時將順流而下趨長沙浙江知縣江忠源督湘勇堵於簞衣渡忠源湖南新甯縣舉人由軍功議叙知縣補浙江秀水縣時丁憂回籍奉養大臣調在籍募勇赴粵烏都統一見器之遂贊其軍略旋率所部援全不得進乃駐

兵下游襲衣渡伐木爲堰伏西岸賊舟過力擊之塵
戰兩晝夜斃賊千餘僞南王馮雲山中礮死賊棄船
由東岸赴道州自有此捷長沙得爲備衡永防兵始
安

五月陷道州

賊陷全州後裹脅已衆及至道州湖南提督余萬濟
棄城走道州俗悍多會匪賊踞城月餘從者更衆另
立道州大旂所至爭爲効死賊勢復張

六月疊犯江華甯遠嘉禾等縣陷桂陽州

自道州竄出取道江華甯遠至嘉禾縣總兵和春常祿等躡賊蹤至嘉禾接仗獲勝奪門而入賊卽竄走於二十九日陷桂陽州

七月陷郴州趨長沙

賊陷桂陽州後江忠源率隊趨至前隊把總邢虎臣戰歿江忠源揮勇繼進大破之直抵城下賊棄城走趨郴州郴州當湘粵之衝商賈輻輳駭貨驟馬以千計賊至據之忠源會諸軍壁其三門相持月餘逆首蕭朝貴訶長沙城外民房未拆守兵亦單意可襲而

取也乃率死黨由永興茶陵醴陵趨長沙

八月犯湖南省

賊黨疾馳赴長沙七月二十八日至省總兵和春常
祿李瑞德亮與江忠源各率兵勇倍道追之亦抵長
沙賊踞城南及小西門民房爲窟竝占妙高峯蒸山
廟等高阜爲壘駱巡撫秉章提督鮑起豹在籍羅巡
撫繞典會督邑紳黃冕唐際盛等獎帥兵民登陣固
守八月初四日鮑提督派四川兵勇下城功擊斃賊
多名善化縣知縣王葆生所募壯勇亦隨同官兵出

城殺賊無數新授湖南張巡撫亮基自雲南來縋城而入會籌堵禦益力偽西王蕭朝貴攻南門官兵擊之殪尸埋老龍潭後起獲梟劉洪秀全楊秀清先在郴州朝貴死賊黨李開芳馳告遂悉醜類馳至廣築土壘分屯西岸土牆頭及湘江之水陸洲併力攻城兵民百計守禦向提督率將官張國樑等踵至營於西岸嶽麓山一帶游擊蕭逢春都司姬聖脈戰歿提督秦定三總兵和春等營於東自天心閣直至新開舖皆官軍堅壘朝夕夾擊槍礮聲震天地軍威漸壯

九月官兵圍勦獲勝

各路大兵齊集賊不得逞自陷郴桂得探煤山夫千餘人仿鰲翻法立土營偽師帥穴地攻城九月二十九日南月城西魁星樓側發地雷城蝨四丈餘二三千人轟擁而上四川越嶲營參將張協中搶護中槍殞命副將鄧紹良大呼躍出城關手刃數賊右膊被礮子穿透屹立不動弁兵齊下斬大黃旗賊目斃長髮賊一百數十名短髮賊三百餘名賊始敗退迅將城關堵合十月初二日城外金雞橋地雷再發總兵

和春塔之十八日魁星樓地雷又發副將瞿騰龍力
扼殺悍賊數百賊之地道已盡復缺油鹽勢漸窮蹙
羣心漸離洪秀全營於南門外取玉造偽璽稱爲天
賜以籠絡羣心脅衆呼爲萬歲遂於十九日夜從浮
橋渡湘水由回龍塘竄去故分小股向南行我兵謂
賊必犯湘潭傳東岸軍南向賊之大股已竄甯鄉矣

十月陷岳州

賊由甯鄉至益陽追賊之參將紀冠軍陣亡賊擄民
船數千出臨資口渡洞庭抵岳州湖北提督博勒恭

武駐岳督防先三日棄城走賊留岳州四日郡城舊存逆藩吳三桂軍械礮位盡爲賊得復奪民舟五千餘遂東下

十一月賊下湖北陷漢陽府

十一月初九日賊驟至逕撲漢陽十二日郡城失守調防之陝西副將朱瀚陣亡知府董振鐸巷戰死漢鎮爲數省通衢百貨山積遷避不及被焚掠五晝夜殆盡

十二月武昌省城失守巡撫常大澗等皆死之

武漢一江隔冬令水涸江中漲巨沙洲賊以所擄船作浮橋鐵索環之自漢陽直達省城四圍立壘分門攻撲時程總督喬采駐軍衡州惟常巡撫大瀆督兵防守向提督自湖南帶兵追襲營於東門外之洪山連戰皆捷隔賊壘與省兵不能合十二月初三日黎明自洪山出隊連燬賊壘數十座槍礮斃數千驅溺於武勝門外之沙河亦數千尸骸枕藉河水爲之不流斯時官兵距城不及三里盼城中兵出接應屢遣差弁相約常巡撫恐民志未孚啓門或致逃避欲待

客兵抵城下始出不期寒雨大沛火藥不燃兵力亦極疲困向提督因令收隊而城不保矣賊未至時常巡撫縱火盡燬城外民房以防穴地文昌門濱江未及防賊已穴深丈餘初四日黎明地雷忽發城遂陷巡撫常大滄學政光祿寺卿馮培元布政使梁星源按察使瑞元漢黃德道王壽同丁憂鹽道王東槐署鹽道林恩熙武昌府知府明善武黃同知周祖銜等皆殉難江夏縣知縣繡麟持矛巷戰死尤烈

褫兩湖總督程喬采職以張亮基代之

程總督辦理防堵駐兵衡州省城陷後奉

旨革職留辦糧臺後議遣戍張總督先任湖南巡撫至是

由湘赴鄂

平定粵匪紀略卷二

咸豐三年癸丑正月賊全股下竄向提督收復武昌

前因逆匪竄擾湖南賽大臣師久無功奉

旨逮問

命兩廣總督徐廣縉爲

欽差大臣督辦軍務長沙解圍後始抵湖南省城逆匪已

直竄武昌徐大臣尙駐岳州亦奉

旨逮問

授向提督榮爲

欽差大臣復

命前大學士琦善爲

欽差大臣選直隸陝西黑龍江馬步各兵由河南進勦以防北竄賊陷武昌後向大臣帶兵勇日夜擊之賊不能久踞欲由襄樊北趨偵知河南重兵扼守遂於三年正月初二日下竄是時所俘男婦約五十萬人船約萬餘隻資糧軍火財帛與婦稚盡置舟中蔽江而下帆檣如雲新舊賊分兩岸夾江以行所過黃州武昌蘄水蘄州均爲殘掠直抵廣濟縣之武穴鎮向大

臣於賊竄後收復省城招集地方官辦理善後事宜
卽追賊東下

賊至廣濟縣之武穴鎮兩江總督陸建瀛兵潰退保金
陵致九江安慶失守

先是二年十月

上命兩江總督陸建瀛爲

欽差大臣督兵進防江皖時兩江先奉調撥官兵三千名
駐紮楚境武穴下之老鼠峽陸總督募勇未集卽帶
松江提標兵二千餘名親兵數百名由水路上駛三

年正月十一日抵湖北廣濟縣之龍坪孤壽春鎮總
兵恩長爲翼長督隊至老鼠峽會合前兵共籌堵禦
舟師未及登岸紮營賊已驟至恩總兵督戰陣亡舟
師潰散陸總督退保金陵江西張巡撫芾駐防瑞昌
縣爲入境陸路九江府城未設防賊遂薄九江而下
十七日陷安慶省安徽蔣巡撫文慶死之藩司李本
仁退守舒城縣臬司張熙宇奉孤帶礮船防守小孤
山亦退回均奉

旨逮問

二月賊陷金陵

陸總督退回金陵卽帶新調廣艇及兩江原設舳板
船進防蕪湖下游之東西梁山師船復不戰而退遂
回城固守正月二十五日夜賊船由太平府四合山
順流而下二十六日辰刻福山鎮總兵陳勝元等迎
勦擊沈逆船二隻餘匪暫退官兵追至蕪湖又擊沈
二十餘船是日戌刻逆眾水陸竝至陳勝元中礮落
水死賊至金陵二十九日城外紮賊壘二十四座其
賊船自新洲大勝關起泊至七里洲止晝夜環攻兵

民協守甚固聚寶門外米商自團練勇齊心殺賊賊
幾敗城頭開礮助威適傷練勇數人遂駭散布政使
祁宿藻目擊忿甚嘔血死二月初十日儀鳳門地雷
舉發賊驟登第二雷又發賊自斃千餘官兵乘勢擊
之競割耳記赴局報功守陣兵力轉薄賊大隊擁至
急調各城防兵北嚮堵禦另股賊已由三山門越城
而入將軍祥厚副都統霍隆武率滿兵防守內城城
中婦女亦登陣持槍殺賊相持兩日夜力竭殉難各
賊分門劫殺陸總督及提督福珠隆阿均被戕前廣

西巡撫鄒鳴鶴獲咎後奉調隨辦防務亦在城遇害
上元縣知縣劉同纓公服坐大堂罵賊被攢射而死
前浙江總兵湯貽汾僑寓秣陵賦絕命詩從容就義
官紳殉難者極多

向大臣追賊至金陵結營城東孝陵衛

賊眾下竄後奉

旨飭向大臣追援金陵師行極速張國棟領頭隊正月十
二日卽至九江無舟不得濟咨江撫由省撥回空漕
船載之東渡二月二十一日始達金陵結營朝陽門

外孝陵衛卸任廣東學政內閣學士許乃釗奉

命幫辦江南軍務亦由江西馳至

逆黨林鳳祥等率水陸諸賊陷鎮江揚州

洪逆與楊秀清計欲分賊守江南而自統全衆由淮
安北趨有一老舟子言北路無水乏糧遇困莫解今
據長江之險舟師萬千宜踞南京爲都楊秀清聽其
說遣僞丞相林鳳祥羅大綱李開芳曾立昌等率賊
東下二月二十一日陷鎮江府二十三日陷揚州府
先是揚州有民人江壽民素任修橋卹發諸事一郡

稱善人聞賊且至釀富戶金賄賊與賊約不相犯賊
偽許之富戶恃以無恐遷避甚少賊乘無備突入搜
劫資財千百萬拘江壽民於立貞善堂旋自縊賊得
鎮場乃分據浦口瓜州各要隘徧立土壘以阻我南
北路之師

向大臣擊賊獲勝

二十五日五鼓分路開仗直攻附郭各土城克之二
十七日我兵營土城賊以四五百人出撲迎擊之斃
多名斬首數十級二十九日向大臣親自督戰逆勢

不支相率逃潰我兵始逼城紮營

三月向大臣擊賊於通濟等門大捷

官兵初與接仗賊尙易視附城各賊壘堅守抗拒三月初六日向大臣與許幫辦及按察司銜綜理江西糧臺彭玉雯籌定攻勦之策是夜分路進兵別選精銳直襲通濟門賊壘前後夾擊立破賊壘三座斃賊千餘名奪獲三千觔及數百觔大礮十二尊擡鳥槍二百四十餘桿旂械無數十一日官兵襲占七橋堯將鍾山及報恩寺賊壘隔斷十三日乘霧設伏痛加

勦殺奪獲鍾山圍洗殆無漏網竝生擒偽總制陳轉
各兵勇樹割之十七日夜復戰噴筒火箭直射城中
繼以槍礮逆首楊秀清率眾登城見朝陽門一帶之
牌刀賊匪誤爲官兵開礮轟斃數百城中槍礮競發
人聲沸騰達旦始息自是以後我兵大營十八座一
律移近城垣賊始懼不敢出時副將李德麟與鄧紹
良先後攻鎮江亦疊有斬擒焚燒賊舟救出難民船
多隻又江南觀音門賊船一千數百隻向大臣用計
焚燒船戶水手約萬餘人設法遣散竝燒燬押船長

髮賊無數賊之水隊亦漸斂戢

四月漕運總督楊殿邦督兵攻揚州破土壘木城

楊漕督由淮安馳防揚州結營於距城四十里之邵伯鎮前鹽運使但明倫運使劉良駒會理防務賊衆我寡退守北路招募民勇收聚潰兵四月初一日會琦大臣等兵勇四路進攻城外土壘木城全行蹋燬東路之賊悉避入城

琦大臣直隸提督陳金綬內閣學士勝保先後攻揚州疊獲勝仗

初琦大臣等由河南之信揚州偵明賊蹤進勦陳提督勝學士前行二月二十七日由浦口東山外越赴江邊盡焚賊船進浦口擊賊獲勝三月初九日至帽兒墩琦大臣亦於是日自浦口馳至營於雷塘集距賊均止數里初十日琦大臣督肅州鎮總兵雙來等攻城北之賊陳提督攻西路各燒賊壘數座殺賊千數百名十二日五戰五勝琦大臣進紮寶城陳提督等紮司徒廟各距揚城三里二十二日乘大霧攻賊不備得勝於廿四橋及法海寺迨東路土壘破後西

北二路亦已一律掃蕩城外全無賊蹤其南路濱運河賊船林立亦經地方官紳焚勦略盡

賊眾由揚州分擾滁州踞臨淮關陷鳳陽府

林鳳祥等爾僞指揮曾立昌踞揚城驅婦女及所劫資財運回金陵率賊二十一軍北竄每軍數千人擾滁州占踞臨淮關四月二十一日陷鳳陽府勝學士由揚州分兵進勦

賊分竄六合署知縣溫紹原殲之

揚州分賊北竄時令逆酋朱錫琨黃益芸率六軍犯

浦口攻六合方琦大臣赴揚時畱黑龍江馬隊二千
駐浦口又分吉林馬隊四千人爲八起分駐六合等
處以防後路逆曾等於四月初六日襲浦口初八日
抵六合署知縣溫紹原豫團民勇拒之於龍池千總
徐琳外委達成榮戰死紹原督團再進並約馬隊帶
兵官副都統德崇額督攻二更後賊營火起煙燄障
天燔灼而死及槍礮轟斃者數千所存無幾遁回金
陵城

五月閩浙總督蘇成署漕運總督查文經漕運總督福

濟先後會兵圍揚州

閩浙總督慧成帶宣化等營由東河赴揚州署漕督
查文經帶漕標徐州鎮各兵參將馮景尼帶壽春勇
參將師長鏢帶淮勇繼至方揚州失守時北路幾無
堅城江蘇臬使查文經因治豐北黃河隄工駐清江
浦聞警徧行檄示言有京兵數十萬北來飭游各
邑備馬料諭軍民毋恐賊因警怯不敢長驅及楊漕
督褫職遣戍查臬使接署漕督帶兵與慧總督先後
至紮水陸各營於東路之茱萸灣嗣正任漕督福濟

接篆查臬使移營南路陳家巷城圍始合

左副都御史雷以誠募勇駐萬福橋防揚州東路

雷副都御史與翰林院侍講學士晉康奉

命巡視黃河隘口請

旨勦賊晉學士爲慧總督長子隨其營旋與查臬使紮陳
家巷雷副都御史廣延豪俊捐資募勇自成一軍紮
營揚城東南之萬福橋距城最近與各營相犄角以
保東路裏下河各州縣門戶賊垂涎裏下河久屢撲
屢却之自合圍後賊間日出爭各路均嚴陣設伏以

待每戰必捷殺賊以萬計賊始窮蹙勝學士赴河南
後雷副都御史升授刑部侍郎幫辦琦大臣務

湖廣總督張亮基檄諸郡邑練團勦餘匪

逆自粵入楚沿途煽誘惡少年聞風響應未來則歛
錢饋賊曰進貢既去則假其旗幟裹黃布聚衆爲淫
掠廣東之凌十八溫大賀五輩皆倚聲勢湖南岳
州有晏仲武尤凶暴先後盪殄略盡湖北蟻賊如蝟
毛長江而下則監利石首沔陽通城崇陽蒲圻爲之
壑襄河以上則安襄荆德受其災至是行團練之法

遴選紳耆糾訓良家丁壯捕不道羣賊稍欽迹

湖南團練鄉兵爲諸路倡

禮部侍郎今

封一等侯

欽差大臣協辦大學士兩江總督曾國藩以親喪在湖南
湘鄉籍有

詔使治鄉兵乃詳設方略練勇爲諸路倡仿明戚繼光編
東隊伍法創爲湘勇營其制每營五百人擇官紳誠
樸者率之厚其資糧嚴以軍法日事訓練先討衡山

之
大
年
目
錄
卷
二
一
土匪曹戴等繼捕瀏陽徵義堂土匪周國愚等皆平
之湘勇遂以勁旅稱俊傑之士相繼而起後皆以忠
節名於時

湖北按察使江忠源赴江南大營

忠源以解桂林圍有蓑衣渡之捷擢知府以援長沙
功擢道員湖廣張總督奏署湖北按察使旋實授奉
旨飭赴江南營

逆黨由安徽鳳陽竄擾河南

勝學士自揚州帶兵躡賊後由滁州攻鳳陽賊不能

久踞遂竄河南

河南歸德府城陷賊犯開封省官兵擊走之

楊秀清遣劇賊僞丞相吉文元等由浦口竄擾亳州一帶與陷鳳陽之林鳳祥合股乘間入河南境陷永城五月初七日闖入歸德府城巡撫陸應穀親督各將弁分道進勦聞逆黨將窺開封急檄藩臬司沈兆樞林揚祖登陴固守賊已由睢州甯陵杞縣陳留逕撲開封十三日抵城時將軍托明阿提督善祿已革都統西凌阿督三鎮兵過睢州聞警倍道而馳十八

日抵汴梁省奮力攻擊署祥符縣知縣何懷珍亦募勇出城助勦賊知不可犯由朱仙鎮退竄中牟縣我兵會追二十五日又敗之於汜水縣逆眾奔黃河渡口適西北風大不能開船燒燬逆船十三隻斬擒二百餘名溺死無數

上深念逆氛未靖而河南爲濱河要塞

命直隸山東西督撫合力防河總兵董占元自大名鎮往總兵花里雅遜布自兗州鎮往會於河北事權一統之於

欽差大臣直隸總督訥爾經額蒙古盟長察哈勒旅亦遐
邇雲集爲河南應援逆情始懾

揚州營攻城已登不果克

賊於東路天甯等門偷搭浮橋由地道奔突而出經
慧總督先期獲奸細訊出實情派臬司查文經學士
晉康等帶隊堵截知會北路琦大臣等督兵備之賊
甫出卽回爭橋墮水死者極衆東關城上諸賊復譙
擁而出亦經擊退並用火器燒其望樓多座五月二
十七日琦大臣飭肅州鎮總兵雙來用一萬六千觔

大礮轟城礮爲查臬司辦江南善後時所鑄設圍山
關運赴大營是日開用擊坍城垣數處雙來見有機
可乘用木棍作浮橋過河支雲梯奮勇直上適東路
雷侍郎亦派鹽知事銜張翊國帶勇抵城分梯而上
兩頭殺賊勢已垂克先是逆酋因原城窄狹於馬路
旁支木鋪板爲樓寬約二三尺高與城齊賊中名爲
跑馬樓賊見官兵登城自將跑馬樓放火焚燒烈焰
薰騰我兵不能驟下雙來被槍子折二齒張翊國亦
身受多傷且兩路均無接應跳城撤隊經此懲創賊

守益密

瓜州紳士擊賊陣亡

賊分踞鎮江揚州以瓜州下虹橋爲往來要衝本處紳士侍讀銜中書鍾淮團勇於虹橋殺賊頗衆五月二十九日約會江口水師艇船會攻直抵瓜州正接戰間忽轉西風艇船驟退致鍾淮與已革揚州營守備方綱陣亡幸團勇扼守虹橋賊不敢進

逆黨犯江西南昌府官兵勝卻之

楊逆遣僞豫王胡以晄等犯安徽桐城破集賢關遂

再陷安慶又遣僞丞相賴漢英石祥貞攻九江湖口
進圍南昌張巡撫芾偕在籍辦理團防陳尙書孚恩
距守時湖北臬司江忠源銜

命赴金陵大營抵九江聞南昌圍星夜往援適張巡撫等
亦飛檄召之馳四日至賊望見楚軍旂幟驚曰江妖
來何速也賊以官爲妖故云忠源入城卽會同布置
有營兵謀縋城走者立斬以徇五月二十日分三路
出城直撲賊隊往復四次糧道鄧仁莖知府耆齡林
福祥督兵勇下城助戰擒賊甚多二十一日二十八

日再戰均捷人心以安

六月南昌逆匪用地雷轟城堵截獲勝

六月初二日江臬司統楚川江三省兵勇竝六品頂戴前臬司徐恩莊等練丁分三路進兵斃賊數百名遣浙江守備封九貴同時由章江門下城焚燒賊船浙江游擊常海督兵在城上開礮助之燒賊船多隻賊復用地雷於得勝門新築月城外轟塌城牆六丈餘蟻擁而上江臬司同弟忠濟率楚勇首先抵禦殲戮多名賊退卽將關口修繕完固

河南逆黨犯懷慶

逆黨自汜水敗退由鞏縣潛收煤艇渡黃河分擾鄭州榮陽六月初二日圍懷慶府訥大臣遣將軍托明阿提督善祿都統西凌河渡沁河由武陟一帶沿岸捕勦轟斃其坐龍錦褥服黃袍賊目二名賊勢少卻遂趨懷慶勝學士保先繞道馳護府城逕撲賊壘先東後西連戰皆捷

諸路大兵會勦懷慶賊

初渡河賊尙少官兵屢挫其鋒至是逆援陸續偷渡

黃河築木柵以阻我兵山東李巡撫德越境勦賊訥
大臣勝學士托將軍善提督西都統副都統雙成各
帶兵勇及黑龍江西安馬隊先後馳至前理藩院尙
書恩華亦統兵前進分營東北路清化鎮等處奮力
會勦節次斬獲不下數千名賊之初至也諸路兵未
築城幾陷知府余炳燾知縣裘寶鏞會同都司穆特
布百計堵禦破其地道數處堅守待援及大兵雲集
賊嬰壘抗拒僅能自保不復敢攻城

鎮江兵失利琦大臣敗賊於揚州三汊河

六月十三日賊自鎮江城出撲官軍營盤我兵接仗北固山下伏賊齊起並於城垣開暗門出賊縱火天熱風猛七營同時被焚鄧紹良退守丹陽經管帶廣艇都司劉廷鏌同參將站住督帶潮勇馳援賊退入城十五十七等日賊擾丹徒鎮復爲劉廷鏌擊退向大臣派總兵和春督湖南廣東兵由馬陵進紮徒陽運河內之辛豐鎮劉廷鏌亦至賊始不敢南竄常州得安瓜州賊會浦口賊亦於十九日進攻三汊河大營我兵擊走之侍衛德興阿游擊黃志配都司毛三

元追至分水龍王廟焚賊艇而還

揚州造樓船攻城總兵雙來陣亡

揚州東路大營分紮茱萸灣等處距城十數里中隔
運河不能近城東路總營務處直隸州許道身兩淮
鹽運判杜文瀾與參將師長鑣密商用樓船以代雲
梯派人探量揚城外運河水勢測其寬窄深淺於上
游邵伯湖內取回空漕艘二隻鳩工改造在船尾豎
板二丈餘層級而上擬乘潮駛至城下以船尾倚城
墻如雲梯以船首抵東岸設橈板渡兵勇登兵船成

稟知慧總督等知照琦大臣派兵攻西北面以分賊
勢約定十八日寅刻進兵令參將馮景尼豫伏壽州
勇於東岸奶奶廟船至卽令長驅師長鑄等如期駕
樓船驟進卯刻抵城船尾邵倚便意門女牆守賊駭
散船首已設統詎馮景尼之勇不至無一人登者賊
見無後應放火焚船時琦大臣派總兵雙來攻北城
右散中礮兵勇負之以退雙總兵昏迷中猶大呼登
城殺賊次日因傷殞命慧總督等奏參馮景尼革職
畱營効力

各直省行堅壁清野法

各路統兵大臣頻以戰功入報而逆黨尙縱橫出沒
分陷江南北郡邑未克剪除重城亦未有攻復者

上洞知其弊疊降

綸音仿嘉慶間堅壁清野之法或築壘浚濠或練丁團勇
守望相助協力同心一隅有驚附鄰畢至使賊進無
所掠退所無歸不能乘便空軼自兵興訖盪平終以
此爲策首

雷侍郎創議捐收釐金以濟軍餉

揚州大營四集軍餉不支雷侍郎自成一軍尤無取
資處因江都之仙女鎮各會館舊有抽收釐金章程
遂於是月仿行以濟軍需坐賈則按月收捐爲板釐
行商則設卡抽捐爲活釐按獲利之厚薄約取百中
之二三商賈不致病累而軍餉以充後各省皆循行
之軍興十餘年士馬得資飽騰釐捐之裨不淺

七月河北軍大破賊木柵懷慶解圍

賊立木柵爲城深溝堅壘抗拒幾及六旬我兵四面
環攻血戰十餘次殲其精銳賊黨震懼有渙志我兵

縱反間離其心腹明示以逆順禍福於是拔身投誠者數百人訥大臣親督諸將會城下七月二十八日分五路攻賊壘毀其木柵電掣雷轟柵中棚房悉灰燼賊棄柵遁合力追勦擒斬三千餘人偽帥授首河

北肅清

湖南軍馳援江西解吉安之圍分勦太和安福之賊悉平之

逆圍南昌竝分賊竄入腹地江臬司飛書湖南請援曾侍郎駱巡撫派湘勇二千楚勇一千配以鎮守兵

八百馳援其監護行軍者則有候補道夏廷樾翰林院編修今廣東巡撫郭嵩燾湘鄉縣知縣朱孫詒湘鄉縣諸生羅澤南管帶之員則謝邦翰易良幹楊虎臣羅信南康景輝等而羅澤南復率其弟子鄉人自成一軍七月二十日抵南昌因進兵太銳易良幹楊虎臣等歿於軍適吉安土匪滋擾圍城甚急獲諜知與粵逆通江臬司急檄湘軍赴援竝調今直隸總督劉名長佑與江臬司季弟忠淑所募湘勇竝隸夏廷樾麾下至吉安一戰卽解圍復分勦太和安福之賊

悉平之是爲湘勇出境勦賊之始

八月河南懷慶逆竄山西陷平陽府

賊敗於懷慶時南阻黃河北隔太行山東避重兵惟西首黃河太行山之間有小道蛇行鼠伏直竄山西之垣曲縣河東道張錫蕃知縣晏宗望均被戕旋擾曲沃縣踞平陽府直抵洪洞縣事聞奉

旨逮問巡撫哈芬及失守城池各官勝學士保蹤賊先至諸帶兵官亦督師竝進收復平陽訥大臣請馳回正定爲備禦計得

旨令上

欽差大臣關防卽

授勝保爲

欽差大臣

賜神雀刀自副將下有不遵約束犯軍法者先斬以聞

逮前署兩江總督楊文定等治罪

逆初陷金陵時文定爲江蘇巡撫自請守瓜州一帶
蔽入蘇道路旋奉

旨兼署兩江總督及鎮揚二城繼陷京口副都統文藝出

鎮城調兵而文定奏言督率水師乘風進剿斬獲纍纍又奏劾失城各將弁時逆鋒銳甚防務正殷督篆尙未之摘也至是文定文藝皆逮問治以遣戍

革直隸總督訥爾經額職旋逮問

勝大臣既追擊晉省賊賊由洪洞東竄恩尙書華督兵東路未遏賊鋒賊遂由屯留潞城黎城等縣竄入直隸境踞邯鄲縣北之臨洛關擾至深州

上責訥總督退駐廣平革職逮問

屢念畿輔重地尤宜速彰

天討

命惠親王爲奉命大將軍科爾沁郡王僧格林沁爲參贊大臣總統四將軍督旂營察哈爾精兵會勝大臣進勒竝於都城設巡防所

江西省城解圍

逆匪攻撲南昌九十餘日張巡撫陳尙書江臬司等獎勵兵民同心固守八月二十一二等日疊次出城勦殺逆匪紛紛登舟揚帆下竄省城圍解派都司戴文蘭繞出賊前沿途截擊江臬司與鶴麗鎮總兵音

德布追蹤前進

九月賊入湖北境官兵失利於田家鎮旋陷黃州漢陽
二府

江臬司忠源自南昌赴九江至則城已陷適署湖廣
總督張亮基聞九江賊上犯遣前武昌府同知勞光
泰率礮船駛至田家鎮飭糧道徐豐玉漢黃德道張
汝瀛會辦防堵編巨筏橫江載礮數十其上截賊舟
賊已踞田家鎮之牛壁山江臬司由瑞昌興國趨至
按行營壘嘆曰此天險也而軍情地勢兩失之謀以

次日移營羊角山日晡會食忽報賊船上駛急馳赴水營賊居山開礮下擊防兵多逃卽令礮船迎敵勞光泰所募皆廣東潮勇不戰而潰且有從賊者江臬司率鶴麗鎮之兵搏戰賊來益眾突圍出徐豐玉張汝瀛荆門直隸州知州李楨候補知縣杜文浩等皆陣亡時九月十三日也賊盤踞入楚要隘水陸竝進先陷黃州知府金雲門罵賊被害繼陷漢陽知府俞舜卿抱印投水死知縣劉鴻庚亦殉難賊分踞之

河北軍克復深州

賊竄踞深州旁擾欒城一帶烽火不絕於道及聞大將軍出征逆情震懼九月十九日勝大臣遣將軍綿洵桂齡蘊秀等帶兵攻城之西北西南西凌阿善祿攻城之東南親統馬隊直擣東北逆衆出城抗拒殲斃七八百名餘匪遁回城中二十日全股由東南而竄收復州城

十月逆黨擾天津踞靜海縣

賊自懷慶潰圍出尙有二萬餘衆楊秀清又由金陵遣僞官朱錫琨許宗揚往援在道裹脅亦不下二萬

合黨由山西入直隸界當賊之困懷慶也諸邊勁旅未集賊黨有獻議撲天津者逆酋欲甘心懷慶以必破爲期未赴津嗣大軍環攻賊巢乃迂道垣曲曲沃聲東擊西以牽制大軍及深州敗逃遶乘間直走天津沽防已備長蘆鹽政文謙等督兵勦賊殲斃多名賊卽敗退勝大臣於九月二十七日追至靜海縣沿途斬殺賊遁入縣城堅築土壘木柵分屯獨流楊柳青等處前後攻擊數十戰皆捷

賊由湖北漢陽竄德安兵勇擊卻之

漢陽陷後賊分股北竄一陷孝感一由應城犯德安
府至長江埠時湖北學政禮部侍郎青麟按試德安
聞警奏留卸署襄陽縣知縣張開霽辦防勦開霽會
任安陸縣得民心號召紳民一日間得練丁二千餘
人扼守要隘張總督調鄖陽鎮兵五百人亦由天門
抵應城聲勢漸壯先是二品頂戴臬司唐樹義帶兵
駐黃州總兵楊昌泗駐田家鎮賊至先後退黃陂至
是合兵進紮楊店以遏孝感之賊賊因三面防兵並
至合股退至漢陽經署漢陽府同知伍惺督勇截擊

賊全股退黃州

賊陷安徽桐城舒城犯廬州

初石逆達開在安慶分兵四掠擇本地助虐者爲鄉官授以僞職令按畝收銀糧詭託安民實掊克自富及是秦逆曰綱至代達開達開尙外假寬恕而曰綱則惟事凶狡遂於十月十四日乘雨直撲集賢關進攻桐城文生張勳求援於前臬司張熙字答以未接警信旋退守大關致各壯勇腹背受敵同時潰散桐城失守二十九日復陷舒城總兵恒興退回廬州在

籍督辦團練呂侍郎賢基與隨營委員通判徐啓山
在舒城行館內殉節奏帶司官刑部主事朱麟祺接
仗陣亡旋經撫臣先後查報奉

旨張熙宇恆興正法呂侍郎等分別

賜卹後張熙宇畏罪自盡自舒城失後逆氛逕指廬州廬
州者安徽文武大吏所僑寓以爲省治也

十一月金陵逆遣江西敗退之賊援揚州又令安徽灣
沘之衆由蕪湖泊高澗湖圍窺東壩兵勇擊勝之

是時向大臣駐金陵派兵圍鎮江琦大臣營揚州督

攻均急鎮揚二城之賊久困金陵首逆遣僞丞相賴漢英等領江西敗回之衆奔奪江北三汊河糾合儀徵賊黨同援揚城副都統薩炳阿率馬隊總兵瞿騰龍都司毛三元率步隊衝其前副將松齡等由中路水道截其後賊退踞儀徵困揚城如故而安徽甯國所屬灣沚之賊退出大江由蕪湖進泊高淳湖意圖窺伺東壩以解鎮江之圍向大臣遣鄧提督紹良德總兵安謹守東壩迎擊斬獲極多

天津大營失利蒙古副都統佟鑑知縣謝子澄陣亡

勝大臣屢戰克捷進逼津衛口十一月二十三日賊
匪傾巢來撲廂黃旂蒙古副都統佟鑑用礮橫擊見
賊大潰乘勝驟進拽取濠板足滑踣地被賊圍刺知
府用天津縣知縣謝子澄銳身護救同時陣亡
賊竄赴瓜州揚州軍收復府城帶兵官均獲譴

先是奉

詔以揚城圍賊窮蹙必殲除罄盡無俾旁突滋擾是月賴
漢英率賊黨復由三汊河進撲步步爲營死戰不退
東路參將馮景尼之勇先潰參將師長鑣鹽知事張

翊國等之勇亦駭散揚城賊衆於十一月二十六日
夜全股突出與賴漢英等同由東南竄赴瓜州琦大
臣據實奏參奉

旨將馮景尼於軍前正法師長鑄張翊國遣成琦大臣並
帶兵各大員均革職留營効力

曾侍郎水師發衡州

侍郎督軍衡州念賊擾長江非水師莫能制其死命
遂建三省會勦議治戰艦於衡湘時承平日久人不
知兵水師尤剗舉相顧聘貽侍郎銳意規畫咨商兩

粵購備駁位廣西勞巡撫崇光選派知府褚汝航知縣夏鑾以梧州巡防兵勇護礮赴湘設衡州湘潭兩局製造礮船侍郎精思詣微尺寸皆有築度所泊有拖罟快蟹長龍舳板諸船極水戰之妙咨留護礮之陽江碣石等鎮標兵隨同褚汝航所帶廣勇分配各船爲之董率共募水勇四千人分前後左右中正副爲十營每營配快蟹長龍船各四舳板倍之以褚汝航夏鑾領中營今陝甘總督楊岳斌原名載福今兵部侍郎彭玉麟及褚殿元等分領左右各營派湖南

撫標參將塔齊布與訓導羅澤南守備周鳳山揚名
聲文生曾國葆等募領陸勇亦十營侍郎親自統率
發衛州水陸夾江而下

十二月揚州軍收復儀徵縣

鎮江揚州瓜州儀徵四處賊互相應援急切不得破
及揚州之賊退踞瓜州賊勢稍孤琦大臣責諸將戰
益力十二月初十日攻復儀徵賊沿江遁生擒八人
轟斃二百餘人焚賊艘十五毀賊壘十三座乘勝窮
追直抵瓜州

安徽廬州府城陷巡撫江忠源死之

田家鎮之失也江臬司突圍至廣濟縣旋拜巡撫安徽之

命令楚皖一體當相其緩急爲去留江巡撫以廬州事急上疏請行時逆燄已張田家鎮黨逆復陷英山等處遂由六安州急進所部鶴麗鎮兵留防六安至廬者僅開化鎮軍勇數百而已廬民聞江巡撫至爭登陴捍衛者萬人楊逆遣僞豫王胡以晄率黨十餘萬圍廬巡撫巡城以水西門當賊衝自部親信勇駐之賊

穴東城威武門爲隧道募死士迎出有黃衣賊正據
隧口下窺外委馮貴引刀削其面賊驚譟官兵自城
上擲火彈擊之皆反奔賊復穴水西門城崩數丈巡
撫手大旗緣陣上連斃賊城卒完疏陳守禦狀乞援
師先是壽春鎮總兵玉山以滁州之東關戍卒援拱
辰門戰死陝甘總督舒輿阿率萬五千人駐岡子集
屢戰皆北鶴麗鎮總兵晉德布自六安馳援亦敗於
棗林巡撫弟忠濬同知劉長佑自湖南募勇至營西
平門外之五里墩遣卒挾白蠟油燭夜半縋城入且

告援師已至都司戴文蘭亦自湖北以五十八人懷
鎗入城城外賊騎充斥援師中隔卒不得薄城賊圍
月餘十二月十六日夜再穴水西門城崩賊緣城直
上江巡撫揮兵相搏天且明霧蔽蔽如雨左右血刃
擁巡撫行巡撫手劍自刎不殊有健兒負之走嚙其
項脫身投古塘死同死者布政使劉裕鈔池州府知
府陳源竟己革藩司李本仁同知鄒漢勲胡子離副
將松安雲南鶴麗鎮都司戴文蘭雲南儘先都司馬
良勲縣丞艾延輝與福等